

QK. 291.

v. Cracau

Za

5670

X 2047999
Eine Christliche Leichpredigt aus
dem dritten Capittel des Buchs
der Weisheit.

Bev der Volckrei-
chen Begräbnuß der Weylandt
Edlen/Gottseligen/vnd Ehrtugentfamen
Matronen / Frawen Mariae / geboren von Görß-
dorff/ des Ehrwürdigen/ Gestrengen / Edlen/vnd Ehrvesten/ Herrn
Johan von Krackaw / Domdechands der hohen Stifft / Meissen/
Naumburg vnd Seitz / 2c. Ehegemahlin / welche in Christo seliglich
verchieden zur Naumburg / den 17. Monats tag Januarii dieses
jetzt laufenden 1604. Jahrs / vnd den 19. tag gemeltes
Monats / Christlich / vnd Ehrlich daselbst zur
Erden bestattet.



Gehalten durch

Herrn Johannem Rofi-
num Dompredigern zur
Naumburg.

Gedruckt Im Jahr /

M. DC. IV.

11

11

11

11

11

11

11

11

11

11

11

11

11



Den Edlen / vnd Ehrnbesten Jung-
ckern / Hans Ernten / Hans Georgen / Wolff
Christoffen / vnd David Gebrüdern

Auch

Den Adelichen / vnd EhrenTugentsamen Junck-
fräwlein Marien Magdalenan / Annan / vnd
Elisabethen Schwestern

Seß

Ehrwürdigen Bestrengen / Edlen / vnd Ehrnvesten /
Herrn Johan von Krackaw / Domdechands der Hohen Stif-
te Meissen / Naumburg / vnd Zeitz / ꝛ. Eheleiblichen Söh-
nen vnd Töchtern / meinen großgünstigen Jun-
ckern / vnd Jungfräwlein.



Gnade vnd friede von Gott
dem Vatter / durch vnsern Herrn
Iesum Christum / vnd Trost des h.
Geistes / neben wünschung zeitlicher
vnd ewiger wolfarht zu vorn / Edle /
vnd günstige liebe Junckern / auch Adelige / vnd
EhrenTugentsame Jungfräwlein. Es hat ewer
geliebter Herr Vatter von mir begehret / die Reich-
predigt / so ich bey der Begräbnis der Edlen / Ehren-
Tugentsamen / vnd Christlichen Matron / ewer

vielgeliebten Fray Mutter seligen / vnlangst ge-
than / auff's Pappier zubringen / damit sie zum ge-
dächtniß in druck vorfertiget / vnd etlichen seinen
vorwanten / vnd freunden / die sie nicht gehöret/
möchte mitgetheilet werden.

Wiewol ich nun in betrachtung meiner einfalt/
vnd geringen gaben bis anhero keine Predigt von
mir gethan / durch den druck aufgehen lassen wol-
len / So hab ich doch ewren geliebten Herrn Va-
tern / solch Christlich begehren nicht abschlagen
mögen. Schicke derowegen gethane / vnd ein
wenig gemehrete Predigt / (dann ich mich damals
nach der zeit richten müssen/) Sein. Ehrw. vnd
E. G. zu/schencke / vnd dedicire sie euch / als denen
sie am meisten gebüren / nicht allein darumb / das sie
ein stetiges denckmal / vnd Trost sein soll / ewer ge-
liebten Fray Mutter Christlichen leben / vnd wan-
dels / vnd seligen Abschiedes aus diesem Jammer-
thal / Sondern das sie euch auch eine Erinnerung /
vnd anreizung sey / ihrer Gottseligkeit / vnd löbli-
chen Tugenden nachzufolgen / vnd ihren hertzli-
chen / vnd Mütterlichen vormahnungen Kindli-
chen zugehorsamen.

Wie dann ihr die etwas erwachsen / vnd durch
Gottes gnade zum zimlichen verstande kommen /
den andern ewren Jüngern Geschwistern zu seiner
zeit

zeit dieses auch zu gemüt führen / vnd vielgemelter
erwerer nunmehr seligen Fraw Mutter gedächtniß
nimmermehr in vergessen stellen werdet. Darzu
euch gnädiglichen verhelffen wolle / der ewige / vnd
Allmächtige Gott / welcher allein alles gutes in vns
wircken / vnd vollbringen muß. Dessen gnädigen /
vnd Göttlicher Regierung ich euch sämtlichen
trewlich befehle. Mit dienstlicher bitt / wollet diese
zuschreibung aus trewem / vnd wohlmeinendem
Hertzen geschehen / euch günstig gefallen lassen / Da-
tum Naumburg / den 14. Februarii, Anno 1604.

R. G.

Allz. gefliffener /

Johannes Rosinus Dom-
prediger allhier.

A 3

Christ



Über die wort des drit-
ten Capittels des Buchs der
X. 1. 2. 3. **Weisheit.**

Der Gerechten Seelen sind in Gottes hand / vnd keine
Qual rüret sie an : Für den Vnvorstendigen wers
den sie angesehen als stürben sie / vnd ihr Abschied
wird für eine Pein gerechnet / vnd ihre Hinfart für
ein vorderben / Aber sie sind in friede / etc.

Dhat vns geliebten im HERN der
gütige / vnd getrewe GOTT abermal
vorgestellet einen Spiegel / darben wir
vns erinnern sollen vnserer Sterblig-
keit / vnd der vngewißheit beyde vnser
lebens / vnd dann auch vnser Sterbstündleins : da-
mit wir immerdar in bußfertigkeit leben / vnd vns zu
solchem letzten Abschiede bereiten. Dann es heisset
freylich / Hodie mihi, cras tibi. oder wie der weise
Man Syrach vermanet / in seiner Hauptafel am 38.
Gedencke an ihn wie er gestorben ist / so mustu auch
sterben / gestern wars an mir / heute ist's an dir : Sin-
temal wir alle von Leikauff gedruncken / vnd diesem
vrtheil

Leichpredigt

urtheil vnterworffen sein / Du solt / vnd must des To-
des sterben.

Also lieget hier für vns die Edle / Ehrveste / vnd
Virtugentsame Frau / Maria / geborne von Görz-
dorff / Des Ehrwürdigen / Edlen / Bestrengen vnd
Ehrvesten / Herrn Johan von Krackaw / der hohen
Stifft / Meissen / vnd Naumburg Domdechands re.
Herzliebste Gemahlin / nunmehr in Christo selig /
sanfft vnd still ruhend / welcher wir / wie Christen ge-
büret / als vnserm Mitgliede an dem Leibe vnser
HERRN Jesu Christi / das geleidt zu ihrem Ruhe-
betlein gegeben / vnd den letzten dienst bewiesen ha-
ben. Ferner ist ihr vnser vnterrichts / Erinnerung /
Bermanung / vnd Trost nicht von nöthen / Sie hat
bey ihrem Leben genugsam gehöret / vnd gelernet / das
vbrige wird sie sparen in die Himlische Schule / da sie
den HERRN Christum den ewigen Sohn Gottes
selbst hören / vnd die aller grösten geheimnis von ime
vernehmen / vnd mit grosser verwunderung sich da-
rüber freuen wird. So mangelt es jr auch an Trost
nit / sondern wird mit dem Lazaro (Luc. 16.) in Abra-
hams / oder vielmehr in des HERRN Christi schoß /
vnd Armen kräftiglich getröstet. Wir aber bedürf-
fen noch immerdar allerley vnterrichts / vnd Trosts /
so lange wir in diesem vnserm sterblichen Leibe wal-

Christliche

len/vnd in diser lenden/vnd müheseligen leben/vnd
rechtem Jammerthal sein.

Derentwegen wollen wir den hochbetrübten
Herrn Gemahl/vnd liebsten Kindern/dieser Christ-
lichen/vnd Gottseligen Matron zu Trost/vnd vns
allen zum besten in Gottesfurcht mit einander bewe-
gen/vnd betrachten die schönen/vnd tröstlichen abge-
lesenen wort aus dem 3. Cap. des Buchs der Weiß-
heit/darinnen der Schreiber desselben erstlich geden-
cket der Gerechten/vnd saget von ihrem sterben.

Darnach meldet er was die Gottlosen Welt-
kinder von solchem absterben halten.

Zum dritten zeigt er auch an/was in warheit
nach Gottes Wort/vnd nach dem vrtheil des heili-
gen Geistes darvon zuhalten.

Von welchem dreyen Punctlein wir kürzlich
handeln/den Text erkleren/vnd darneben auch an-
deuten wollen/worzu wir vns denselben sollen nütz
machen/Darbey auch dieser in Christo seliglich ru-
henden Gottseligen Matron/so viel ihre ehrliche An-
kunfft/Christliches leben/vnd seliges absterben be-
langet/gedencken. Darzu Gott seine gnade/vnd
H. Geist mildiglich verleihen wolle/vmb Christi Je-
su seines geliebten Sohns vnsers HERRN/vnd
Heylands willen/Amen.

Don

Leichpredigt



Von dem Ersten Pünctlein.

DAls ich aber diesen Text zur gegenwertigen
Leichpredigt genommen/darzu hat mir vrsach
gegeben/ein kurzes / vnd doch Christliches ge-
spräch / welches kurz / ja nicht eine ganze stunde vor
dem seligen Abschied dieser in Gott ruhenden Frau
Domdechandtlin / zwischen irem geliebtem Gemahl /
vnd ihr / gehalten worden. Dann als sie ihr gelieb-
ter Herr tröstete / vnd zur gedult vormahnete / dieweil
sie einen gnädigen Gott hette / den sie je / vnd allwe-
ge geliebet / sein Wort gerne gehöret / vnd so viel ihr in
dieser schwachheit möglich / nach seinen gebotten ge-
lebet hette / antwortete sie darauff / Für Gott ist
Niemand gerecht. Möchte jemandt sagen : Wie
dann solche reden mir zu dieser Leichpredigt hetten vr-
sach gegeben / da der Text von den Gerechten han-
delt / dieses aber nunmehr in Christo seliglich ruhend
onser mitgliedt an dem Leibe Christi mit ihrem reden
gleichsam bekandt / Sie sey nicht gerecht / Aber das
solches beydes bestehe / vnd nicht wiedereinander sey /

B wer

Christliche

werden eswer Liebe vernehmen / wann wir anzeigen
werden / welche Leute der Schreiber dieses Buchs
Gerechte nenne / Nemlich nicht die / so da Gottes Ge-
sätz vollkömlich gehalten / ohne Sünde / vnd tadel /
vnd derowegen heilig / vnd gerecht sein / nicht allein
für den Menschen / sondern auch für Gott. Wo
wolte man solche finden / für welchem (G D E E)
Niemand vnschuldig ist / sagt der H E X X der ewige
Sohn Gottes selbst / im 2. Buch Moysis am 34.
So singen wir aus dem 130. Psalm / Für dir sich
Niemandt rühmen kan / es muß sich fürchten Jeder-
man / vnd deiner gnade leben. Vnd der Prophet
David sagt im 32. Psalm / dafür (nemlich vmb ver-
gebung der Sünden) werden dich alle Heiligen
bitten / zur rechten zeit / vnd im 143. Psalm: H E X X
gehe nicht ins Gerichte mit deinem Knechte / denn für
dir ist kein lebendiger Mensch gerecht / Einer
ists / der mit warheit saget / vnd sagen darff / welcher
vnter euch kan mich einiger Sünde zeihen? Joh.
am 8. Welchen auch G D E E selbst gerecht nennet /
im Propheten Esaia am 53. vnd mein Knecht der
Gerechte / ꝛ.

Das aber wir Menschen auch gerechte genen-
net

Leichpredigt

net werden / solches haben wir diesem einigem
Gerechten zu dancken / welcher vmb vnser Sün-
de willen dahin gegeben / ein Gerechter für die Vn-
gerechten gestorben / vnd vmb vnser gerechtigkeit wil-
len wieder Auferstanden / zum Röm. am 4. vnd in
der 1. Epist. Petri am 3. Cap. vnd von G D E selbst
vns zur gerechtigkeit gemacht ist / in der 1. Epist. Pau-
li an die Corinth. 1. Auff das er durch sein erkant-
niß viel gerechte machte / dieweil Er ihre Sünde ge-
tragen / Esaia 53. Die sich nun im alten Testament
wie grosse Sünder / vnd Vngerechte sie auch gewes-
sen / durch die Evangelische Verheissungen von die-
sem künfftigen gerechten Knechte Gottes wieder auf-
gerichtet / sich mit festem glauben an ihn gehalten /
vnd seines Vordienstes / Leidens / vnd Sterbens ge-
tröstet / die auch im Newen Testament / vnd folgens
in der Kirchen Gottes / auch noch heutiges tages an
dem gesandten / vnd geschenckten gerechten Knecht
Gottes / vnd Heyland der Welt / dem H E X X X
Christo wieder ihre Sünde sich auffrichten / vnd sein
Vordienst / vnd erworben gerechtigkeit im Evange-
lio / vnd den H. Sacramenten vns fürgetragen / vnd
angeboten / mit wahren glauben ergreifen / vnd
ihnen zueignen / die seindt für G D t gerecht / Denn

Christliche

eben darumb hat er den/der von keiner Sünde wu-
ste / für vns zur Sünde gemacht / auff das wir wür-
den in ihme die gerechtigkeit die für G D E E gilt/in
der 2. an die Corinth. am 5. Vnd von solchen Gerech-
ten redet auch dieser vnser Text. Vnd eine solche
gerechte ist auch gewesen diese nunmehr in dem Her-
ren Christo seliglich ruhende / vnd schlaffende Frau
Domdechandin. Dann ob sie wol ihrer sündli-
chen Entpfengnuß / vnd Geburt / vnd darauff folgen-
den / vnd herflissenden allerley wirklichen Sünden
halben sich für Vngerecht / vnd eine arme Sünderin
erkant / vnd bekant / vnd ganz recht / vnd wol mit dem
Propheten / vnd Könige David auß dem 143. Psalm
gesagt / das für G D E E Niemandt gerecht sey:
Welche wort ein anzeigen gewesen / wahrer Christli-
cher demuth / vnd erkantniß ihrer natürlichen Vnrei-
nigkeit / Derentwegen sie etwas mehrers / vnd höhers
bedürffte / darmit sie für G D E E kommen / vnd be-
stehen / vnd dardurch für gerecht erkant / vnd gespro-
chen werden möchte. So ist sie doch abgewaschen /
ist geheiliget / ist gerecht worden durch den Namen des
H E R R N I E S U / vnd durch den Geist vnser G D E
tes / wie der Apostel Paulus redet / in der 1. Epist. an
die Corinth. am 6. Cap. Abgewaschen ist sie durch
die Heilige Tauffe / gereiniget / vnd newgeboren /
wie

Leichpredigt

wie dann die Heilige Tauffe daher ein Wasserbad im wort/ dardurch der HERR Christus seine Gemeine/ vnd derselben glieder reiniget / in der Epist. an die Ephes. am 5. vnd ein Bad der Wiedergeburt/ vnd ernewrung des heiligen Geistes/ in der Epist. an Titum am 3. von dem Apostel Paulo genennet wirdt. Ja sie ist gereiniget durch das Blut Iesu Christi des Sohns Gottes/ von allen ihren Sünden/ in der 1. Epist. Johan. am 1. In der heiligen Tauffe hat sie auch den heiligen Geist empfangen/ welchen Gott reichlich darin vber vns außgeussset/ durch Christum Iesum vnsern Heylandt/ in der Epist. an Tit. am 3. Der ist je lenger je kräftiger in ihr gewesen/ nach dem sie den heiligen Catechismum gelemet / vnd Gottes Wort geme / vnd fleißig gehöret / dardurch er sie auch geheiliget / wie die Außlegung des dritten Articul vnsers Christlichen glaubens bekantnuß bezeuget. Dardurch ist sie auch kommen zu einem wahren glauben an vnsern HERRN Iesum Christum. Denn der kömpt auß dem gehör Götlichen worts zum Röm. am 10. Dardurch ist sie auch gerecht worden / vnd hat hernach allerley fruchte des glaubens/ vñ der auß gnaden empfangenen gerechtigkeit sehen/ vnd der Bormanung des HERRN Christi Math. 5 ihr Liecht für den Menschen leuchten lassen.

Christliche

Ach/sie hat Gott von Herzen geliebet / vnd gesücht / hat gerne vnd fleißig gebetet / Gott angeruffen / ihn gelobet / vnd gedancket. Ist feind gewesen allem mißbrauch Göttliches Nahmens / allen leichtfertigen schweren / fluchen / lestern / Die Predigten Göttliches worts hat sie fleißig besucht / vnd nicht lüderlich einige vorseumet / da sie nur Leibeschwachheit / vnd anderer fürfallender nötiger geschäfte halben nicht ist gehindert / vnd davon abgehalten worden. Nicht allein hat sie in der Kirchen Gottes Wort fleißig gehört / sondern auch daheim gelesen in der heiligen Bibel / in schönen Gebetbüchlein / vnd andern nützlichen / trewer vnd bewerter reiner Lehrer schriften / vnd nach dem sie ihr die Bibel so hoch geliebet lassen / das sie dieselbige gerne alle Jahr ein mahl / gar hienaus gelesen hette / hat sie ihr aus dem schönen Büchlein Doctoris Andreae Hyperii eine Abtheilung / vnd Ordnung fürs schreiben lassen / das sie täglich etwas aus den Psalmen / etwas aus den andern Büchern des Alten Testaments / etwas aus den Apocryphis desselben / vnd auch etwas aus den Schriften des Newen Testaments lesen / vnd also die Bibel ihrem begehren / vnd wunsch nach / jährlich hienaus bringen möchte / Welches vorzeichnus /

vnd

Leichpredigt

vnd Abtheilung sie an dem ort / da sie zu sitzen gepfleget / für ihren Augen an der Wandt angeheftet / vnd die H. Biblia darneben stehende stets gehabt / wie ich selber gesehen.

So weiß ich mich auch zuerinnern / da ihr geliebter Gemahl für etlichen Jahren die Tomos Lutheri zu Jhena gedruckt / käuften lassen / vnd dieselben ihme gebracht worden / das auch sie sich darob zum höchsten gefrewet / vnd gefrolocket / da sie sie gesehen / vnd gesagt / sie wolte auch fleißig darinnen lesen / wie dann auch geschehen.

Vnd dieweil sie GOTT / vnd sein Wort also geliebet / hat sie auch desselben Diener in allen Ehren / lieb / vnd werth gehalten / ihnen viel gutes gethan / Vnd wann sie mit Leibeschwachheit vberfallen / am allerersten nach dem Prediger ihrem Beicht Vater geschickt / vnd ihre Curam am rechten ort angefangen / nach der Vermanung des Weisen Mañes Syrachs in seiner Hauptafel am 38. Wie sie dan vorgangenes 1601. Jahrs / da sie bald / vnd plözlich zweymal nach einander krank wordē / Erstlich den 14. Januarii, dar nach dē 11. Februarii von stund an nach mir geschickt / vnd dan jezo in diser leztē geschwindē krankheit bald anfänglich mit grossem verlangē meiner zu ir zukomē / begeret / vñ gesagt / dz sie sich dessen zu höchstē tröstete /

Christliche

das sie mich bald in erforderung der noth haben könte. Zum gebrauch des heiligen Abendmals hat sie sich selbst angetrieben / welches sie auch das letzte mal mit ihrem geliebten Herrn Gemahl / vnd lieben Kindern / in öffentlicher Kirchen vorsammlung den dritten Sonntag des Advents des nechst abgelauffenen 1603. Jahres nicht lange vor ihrer Leibeschwachheit mit grosser andacht empfangen.

Inn andern eusserlichem ihrem Leben / hat sie sich wie männiglich bewußt / gar eingezogen / vnd still gehalten / vnd sich gehütet / das sie ja Niemande ergernisz gebe / ist aller Vnzucht / vnd vppigkeit feind gewesen / hat Vnschampare wort / vnd reden nicht hören / auch Affterreden / vnd Vorleumbdung anderer Leute / nicht leiden können / sondern alles zum besten gedeutet / vnd den Vorleumbdern das Maul gestopffet / vnd sie von ihr abgewiesen.

Inn ihrem Ehestande ist sie eine rechte Tugendreiche / Vernünfftige / vnd fromme Matron gewesen / viel edler denn die köstlichsten Perlen / vnd Golt / wie der heilige Geist solche Tugentsame Weibespersonen Proverb. 31. Syracidæ 7. selbst nennet / vnd preiset / Ihren geliebten Gemahl hat sie in allen Ehren / vnd

wir

Leichpredigt

wirden gehalten / vnd herzlich geliebet / also / das er
einen getrewen gehülffen an ihr gehabt / auff welche
sich sein Herz kühnlich hat verlassen dörfen Proverb.
31. Dann sie ihme alles liebes / vnd kein leides gethan
hat / ihr lebenslang / darumb ist sie ihm eine freude /
vnd Trost gewesen / vnd hat in allzeit frölich gemacht.
Syrac: 26. So hat sie auch **G D T T** dermassen
gesegnet / das sie vmb ihres geliebten Gemahls Haus
wie ein fruchtbarer Weinstock gewesen / Ps. 128. Als
deme sie in stehender / vnd wehrender Ehe / innerhalb
Ein vnd zwanzig Jahren / Fuff Kinder gebohren /
Sieben Söhne vnd Vier Töchter / von welchen noch
Vier Söhne / vnd Drey Töchter bey dem leben / **G D T T**
erhalte sie lange / Die andern aber seindt bey **G D T T** /
zu welchen sie nunmehr nach Gottes willen auch
kommen / vnd ist ein sonderlicher segen **G D T T** ge-
wesen / das sie ein mahl Anno 1592. zwey Kinderlein /
Annan / vnd Christophorum / vnd Anno 1600. den
27. Aprilis drey Kinderlein / Henricum , Abraha-
mum, vnd Sybillam zugleich auff diese Welt geboren /
eben den Tag vnd in der Stunde / als ihr geliebter
Herz / vnd Gemahl neben andern / an statt / vnd von
wegen eines Ehrwürdigen DomCapittels dieses
Stifts Naumburg zu Torgaw bey des Durch-

G

leuch.

Christliche

leuchtigsten Hochgebornen Fürsten / vnd Herrn/
Herrn Friderich Wilhelm / Herzogen zu Sachsen/
damals der Chur Sachsen Administratoris, vnd
Vormünder / ic. Nunmehr Christlicher vnd löb-
lichster gedächtnis / Jungen Herrleins Johan Wil-
helms / des vierdten dieses Nahmens Tauffe zu Ge-
vattern gestanden / welche drey Kindlein den folgen-
den 1. Tag Maij am Fest der Auffart oder Himmel-
fart vnsers HERREN JESU Christi / nach dem ihr ge-
liebter Herr von Torgaw wieder nach Hause gelan-
get / die h. Tauffe empfangen.

Ob nun wol von diesen fünff Zwillingen nicht
mehr dann eines / nemlich Jungfräwlein Anna noch
am leben / So seindt doch die andern auch wol versor-
get / vnd rechte Himmelspflanzlein worden. Gegen
diese ihre Kinder alle hat sie ein recht Mütterlich herz
gehabt / wie sie dann manchmal gesagt / Gott wol-
le es also haben / habe es also in die Natur gepflanzt /
darumb spreche er auch / Esaiä am 49. Ein Weib kön-
ne nicht wol ihres Kindes vergessen / das sie nicht ge-
dencken solte an den Sohn ihres Leibes. Hat sie zu
Gottes furcht / vnd allertugent auffgezogen / vnd wie
der Weise König Salomon sagt / hat sie recht ihren
Mundt gegen sie auffgethan / mit Weisheit (das ist /
wie es Doctor Luther am rande erkläret / hat sie fein
gezogen /

Leichpredigt

gezogen zu Gottes Wort) Vnd auff ihrer Zungen ist recht holdselige Lehre gewesen / Wie sie dann auch in diesem ihrem letzten Lager gar söhulich gewünschet / vnd zu Gott gebeten / das ja ihre Kinder bey dem Catechismo Lutheri / vnd der wahren reinen Lehre Göttliches worts / darinnen sie erzogen / bleiben / vnd verharren / vnd in keinerley falsche Lehre / vnd Irthum gerathen / vnd verführet werden möchten / wie dann auch für vnd für bey ihrem leben / vnd noch / der Catechismus Lutheri in ihrem Hause fleißig gelehret / vnd gelernet wirdt.

Gegen ihr Gesinde hat sie auch eine feine Hauszucht gehalten / vber die grosse bosheit / vnbedingtheit / vnd Vntrew desselben / vielmahls zum häfftigsten geklaget / vnd allenthalben fleißig zugesehen.

Das seindt alles rechtschaffene fruchte der ausgnaden ihr zugerechneten gerechtigkeit / vnd zeugen / das sie nicht einen Todten / sondern einen lebendigen glauben gehabt. Vnd dieweil sie aus dem glauben herkommen / seindt sie auch Gott gefellig gewesen / Aber wiederumb zum Text. Der gedencket nun auch des Todes / vnd Sterbens der Gerechten / Dann weil die Sünde inn diesem Leben nicht ganz / vnd gar bey ihnen ausgefegget wirdt /

Christliche

sondern die böse Seuche / vnd lust bleibet noch / auch in den Widergebornen / vnd reißet sie an / vnd treibet sie zu allerley wirklichen Sünden. Darumb seindt sie auch dem zeitlichen Tode vnterworffen / welcher der Sünden Sold ist. Zum Röm. am 6. Also hat auch diese Christliche / vnd Gottselige Matron des zeitlichen Todes nicht können vberhoben sein / Wie sie sich dann auch dafür nicht endsetzet / sondern gerne beyde selbst darvon geredet / vnd andere darvon hat hören reden / vnd sich des erinnern / das dieses der alte Bundt / Du must sterben / vnd das es von Gott also geordnet / vber alles Fleisch / Wie Syrach am 14. vnd 41. Cap. seiner Hauptafel sagt.



Vom Andern Pünctlein.

Was helt nun die Welt von solcher Leute / oder Gerechten Absterben? Der fürgenommene vnd vorlesene Text zeiget es an / vnd saget: Sie halte ihren Todt für ein sterben / da beyde Leib / vñ Seele zu nicht werden / Das solches ire meinung / bezeuget eben der Schreiber dieses Buchs an vorgehenden 2. Cap. da er spricht / Es sein etliche rohe Leute / die

te/die

Leichpredigt

te / die da fürgeben / Es sey ein kurz / vnd müheselig
ding / vmb vnser leben / vnd wenn ein Mensch dahin
sey / so sey es gar aus mit ihm. So wisse man keinen
nicht der aus der Hellen wiederkommen sey / ohne ge-
fahr sein wir geboren / vnd fahren wieder dahin / als
wohren wir nie gewesen. Denn das schnauben in
vnser Nasen sey ein rauch / vnd vnser rede sey ein
fünclein / das sich aus vnserm Herzen reget / wenn
dasselbe verloschen / so sey der Leib dahin / wie ein loder
Asche / vnd vnser Geist zurflattert wie eine dünne
Lufft / vnd was ferner daselbst folget. Darnach
halten sie ihren Abschied für eine Pein / als die es vmb
Gott sonderlich verschuldet / das er ihnen das Leben
nicht lenger gönnen / noch lassen wollen / Derowegen
sie auch ihre Arbeit als eitel Sünde / vnd Vnrecht
verwerffen / wie in folgenden 5. Cap. stehet.

Zum dritten halten sie ihre hinfart für ein Ver-
derben / als mit denen es ganz / vnd gar aus / vnd kei-
ne hoffnung eines andern / vnd bessern lebens fürhan-
den sey / Wie sie dann selbst sagen / vnd bekennen inn
angezogenen 5. Cap. Das ist der / welchen wir etwa
für einen Spott hatten / vnd für ein Hönisch beyispiel /
Wir Narren hielten sein Leben für Unsinnig / vnd
sein ende für eine schande.

Christliche

Das aber solch Brtheil der Welt falsch / vnd vnrecht / bezeuget der Schreiber dieses Buchs selbst / in dem er solche Brtheiler vnvorstendige Leute nennet / als die sich in Gottes Regiment / Regierung / vnd sachen lauter nichts schicken / noch richten können / Vnd wie solten sie solches thun mögen / dieweil sie lauter nichts wissen noch halten von Gottes Wort / welches lehret / das Gott seine lieben Kinder / vnd Gleubigen Christen auch offtmals hart angreiffe / vnd ihnen einen zimlichen bitteren Trancck fürsetze / Doch nicht der meinung si zuvorderben / Sondern vielmehr ihnen zum besten / wie dann auch der Apostel Paulus saget / das denen die Gott lieben / alle ding zum besten dienen / in der Epistel an die Röm. am 8. Darumb auch der folgende Text in diesem dritten Capittel saget / Das die Gerechten für den Menschen viel leidens haben / vnd gesteuert werden / Aber solches verhenge Gott über sie / sie zuvorsuchen / vnd befinde sie auch also / das sie sein werth seindt.

Derowegen ob wohl auch diese selig verstorbene Christliche Matron nach laut ihres Namens Maria viel bitterkeit / vnd Creuz in irem ganzen leben / welches sie fast auff das Bierzigste Jar gebracht / erfare / Dañ sie viel lange Jar / vnd fast von jugent auff gros-

Leichpredigt

se wehetagen in ihrem heupte / vnd andere schmerzen
gehabt / vnd sonderlich offtmals gegen ire gute bekan-
ten / vnd freundinne bekant / vnd geklaget / sie werde
schwerlich ausstehen / vnd vberwinden die schwach-
heit im Heupt / darin sie von den lezten ihren dreyen
Kinderlein als Zwillingen gerathen / darzu auch dte-
ses kōmen / das dieselbige drey Kindlein als sie kaum
16. 17. vnd 18. Wochen alt worden / bald alle in 14. ta-
gen nacheinander vorschieden / vnd in dem ißigen
ihrem lezten Lager hat sie auch viel innerliche / vnd
eusserliche schmerzen gefühlet / Aber Gottes gne-
digen willen darin erkandt / immerdar vmb gedult
den lieben G D E gebeten / der Absolution so ihr
zum lezten von mir gesprochen / sich herzlich getröstet /
hernach den 25. Psalm Ihr vorlesen lassen / vnd diese
wort selbst mit grosser Andacht / vnd ganzem ernst
daraus gesprochen / vnd darmit beschlossen. Die
Angst meines Herzens ist groß / führe mich aus mei-
nen nöhten / sihe an meinen Jammer / vnd elend / vñ ver-
gib mir alle meine Sünde /c. Welches ihr Gebet der
gütige / vnd frome Gott auch also bald erhöret / Sie
vber der gegenwertigen Personen gedanken / vnd
vermutung gnediglich / vnd geschwinde endtbunden /
vnd durch den zeitlichen Todt / aus allen ihren nöhten
errettet / eben in der stunde / in welcher sie funffzehen

Christliche

tage zuvor plötzlich mit Leibeschwachheit vberfallen / kurz vor zehen schlägen vor Mittage / Darumb dieser ihr Abschied nicht für eine Pein / noch ihre hinfart für ein Vorderben / zuachten / noch zuhalten.

So viel ihren Adelichen standt / vnd herkommen belangt / ist sie geboren aus dem gar alten ansehenlichen / vnd in Ober / vnd Niederlausniß / auch Schlesien / vnd andern anstossenden Landen berühmten Edlen geschlecht der Görzdorffe. Ihr Vater ist gewesen / der Bestrenge / Edle / vnd Erveste Georg von Görzdorff zur Lupsa Gottseliger: Ihre Frau Mutter aber die Edle / vnd Tugentreiche / Frau Magdalena auch geborne von Görzdorff / welche noch am Lebē / von denen als Christlichen Gottfürchtigen Eltern / ist diese selige Matron in wahrer erkenntniß / vnd furcht Gottes / in allen Christlichen Tugenden / vnd Adelichen Sitten auferzogen worden / Wie sie denn auch dorinnen durch hülffe / vnd beystandt Gottes des H. Geistes / dermassen zugenommen / vnd ihr Liecht vor den Menschen von Jugendt auff bis an ihr ende hat leuchten lassen / das sie ein Spiegel / vnd zierd der Gottesfurcht / vñ Fraulicher zucht / vnd Erbarkeit billich genennet wirdt / Dahero sie sich denn auch in irem ganzen Leben gegen jedermennig-

lich

Leichpredigt

lich also erzeiget / das jederman mit ihr wol zufrieden /
sie werth / vnd in ehren gehalten / Sie hat sich vnge-
acht ihres Adelichen Stammes herblicher wahrer De-
muth beflissen / Mit denen / so ihres standes / ist sie
gang freundlich / die aber nidrigers standes / ist sie sit-
sam vmbgangen / vnd gemeiniglich auff Kindteuffen
Armer schlechter / vnd geringer Leute / ist sie gar frölich
gewesen / sich gegen dürfftige behülfflich / vnd gutthe-
tig erzeiget / vnd wie der Weise König Salomon
Proverb. 31. von den Tugentsamen Weibespersonen
rühmet / hat sie ihre Hende ausgebreitet zu den Ar-
men / vnd ihre Hand den dürfftigen gereicht. Das
sich derwegen solches falschen vrtheils nicht zuvorses-
hen / Sondern vielmehr menniglich ihres Absterbens
halben zum höchsten betrübet ist / Wie wir dann für
Augen sehen / wie viel Leute beyde hie aussen auff der
Freyheit / vnd in der Statt / vnd anderswo wonende /
ihren Tödlichen abgang gar sehr beweinen / vnd be-
klagen / derer viel bey sich gedencen / Sehet Gott an
der Person an / was wirdts wohl mit vns werden /
Wie dann zubeforgen / es werde viel vnglücks her-
nach kommen / weil Gott pflaget vor demselbigen /
mit seinen Gleubigen Christen / lieben Kindern / vnd
Gerechten hinweg zu eilen / sie hinweg zurücken / vnd
zur ruhe zubringen / wie der Prophet Esaias saget am

Christliche

56. Capitel / Aber der Gerechte kömpt vmb / vnd Niemandt ist / der es zu Herzen nehme / vnd heilige Leute werden auffgerafft / vnd niemand achtet drauff / denn die Gerechten werden weggerafft für dem Vnglück / vnd am 26. Cap. Gehe hin mein Volck in eine Cammer / vnd schließ die Thür nach dir zu / Verbirge dich ein klein Augenblick / bis der Zorn fürüber gehe. Vnd so viel auch vom Andern Püncklein.



Vom Dritten Püncklein.

W Als vrtheilet aber der heilige Geist von der Gerechten Abschiede / vnd Absterben?

Weit anders als die Welt / Der Gerechten Seelen saget dieser Text / sindt in Gottes Handt / vnd keine qual rühret sie an. Ob wol der Leib / vnd Körper wird in die Erden gescharrt / muß den Würmern zu theil / vnd wieder zur Erden werden / darvon er genommen ist / Genesis 3. So wird doch die Seele also balde von den Engeln zu dem lieben Gott getragen / vnd gebracht / wie auch der Prediger Salomon sagt / am 12. der Staub muß wieder zur Erden kommen / wie er gewesen ist / vnd der Geist wieder zu

Gott

Leichpredigt

Gott/der in gegeben hat der nimet sie in seine Allmech-
tige Hande/da sie also sicher/vnd verwart sein/das sie
niemandt. darauß reissen kan/ da rühret sie keine qual
an/Ihr jammer/trübsal/vnd elend/ ist nun komen zu
einem seligen endt / Sie seindt in friede / ob sie gleich
hier viel leidens gehabt / so sind sie doch gewisser hoff-
nung das sie nimmermehr sterben: ob sie ein wenig ge-
steupt werden / so wiedersehret ihnen viel gutes/Vnd
wie Abigail saget zu dem Könige David / werden ire
Seelen eingebunden / vñ eingewunden in das bünd-
lein der Lebendigen bey dem H E X X N ihrem Gott
1. Samuel. 25. Eine Mutter der Gott ein Kindlein
bescheret hat im Ehestande/hat die gröste freude an
im/vnd weñ es noch zart/vnd jung ist / wartet sie des-
selben ganz fleißig / ist sorgfeltig darfür / windet es in
Windelein/nimpt es in ire Arm/hutschet / vnd küßet
es/bald leget sie es an ihre Brust / vnd giebet ihm ein
krefftiges labe/vnd stercktrüncklein/weiß nicht wie sie
freundlich/lieblich/vnd holdselig genug mit im umb-
gehen solle / wann es ein wenig erstarket / nimpt die
freundlichkeit mehr zu/vnd thut also die Mutter irem
Kindlein alles guts / Eben also handelt / kurzwei-
let / scherzet / vnd spielet auch vnser lieber H E X X
Iesus Christus mit den Seelen der verstorbenen
Gerechten/Lachet sie an/ Tröstet sie / wie den Armen

Christliche

Lazaro geschach / Luc. am 16. Cap. vnd am Jüngsten
tage wann auch der Leib wieder aufferwecket / vnd mit
der Seelen wirdt voreiniget werden / da wirdt dann
erst die freude angehen / vnd derselben nicht wenig /
sondern die fülle / vnd immer vnd ewiglich lieblich we-
sen sein / wie David im 16. Psalm saget / Derwegen
wir auch nicht zweifeln sollten / was diese Matron die
Fraw Dondehandtin anlangt / Ob ihr Leichnam
gleich auch in die Erde wirdt verscharret / vnd begrab-
ben werden / nach dem ein mal vber alle Menschen
von Gott gesprochenem Brtheil / das ire Seele den-
noch in Gottes Hand sey / vnd keine qual sie anrühre /
Ja das sie auch von unsern H E X X N Jesu Christo
ganz freundlich vnd lieblich gehalten / vnd getröstet
werde / bisz sie am jüngsten tage mit ihrem aufferweck-
tem Leibe wiederumb voreiniget / in die ewige / vnd un-
ausprechliche freude wirdt vorsehet werden. Dann
selig sindt die Todten / die in Christo dem H E X X N
sterben / von nun an / ja der Geist spricht / das sie ru-
hen von ihrer Arbeit / denn ire werck folgen inen nach /
sagt eine stimme vom Himmel in der Offenbarung
Johannis am 14.

Ob es nun wol wehe thut / wann zwen Eheleute
die sich mit einander sein friedlich / vnd wol begangen /
durch den zeitlichen Todt von einander gescheiden

Leichpredigt

werden/wie dann hiervon Doctor Martinus Luther
in Tischreden (cap. 36. pag. 421.) gar anmühtig redet/
als er den Herrn Doctorem Blyckartum Syndringen,
welches Eheliche Haußfrau/ eine Ehrliche Tugentsame
Matron plögllich / vnd vnvorsehens Anno 1539. den 15. Julij mit Tode abgangen/in seinem großen
Greuge getröstet / vnd hernach heim kommen/ Es muß spricht er / die größte trawrigkeit / vnd herbleid
sein/ wann zwey fromme Eheleute / die sich wohl mit
einander begangen/ lieb / vnd werth gehalten/ leiblich
von einander sich scheiden müssen/ vnser **H E R R**
G D T T ist der größte Ehebrecher / derselbige führet
vnd füget zusammen/ vnd scheidet wieder von einander:
Wie schlipfferig / vnd vnbestendig ist doch vnser
leben/ Ach es muß wehe thun/ wenn Eheleute die
sich lieb haben/ also gescheiden werden/Hactenus Lutherus.
Ja ob es wol wehe thut/wann den Kindern die Eltern /
sonderlich die Mütter / die sie herzlich geliebet /
vnd treulich für sie gesorget/ Wie dann alhier auch
geschehen/absterben/ So sollt man doch **G D T T E S**
gnedigen Willen erkennen / der einem jeden sein
ziel gesetzt / welches er nicht überschreiten mag/
der auch seine vrsachen hat/ worumb er heute diesen/
morgen einen andern von himmen abfordert/Soll sich
denmach zu frieden geben / vnd mit

Christliche

dem Patriarchen Hiob cap. 1. sagen / Der H E X X
hats gegeben / der H E X X hats genommen / der Nah-
me des H E X X X sey gelobet / Soll sich des lieben
Gottes trösten / der von sich rühmen lesset / Ps. 68.
Er sey ein Vatter der Weyden / vnd ein Richter der
Witwen / vnd Wittwer / soll sich auch des trösten /
das den selig vorschiedenen wol ist / die selige ruhe inen
gerne gönnen / vnd wissen / das sie wieder zusammen
kommen / vnd wie sie hier mit leid / vnd trawren von
einander geschieden / wiederumb mit freuden / vnd
frolocken einander sehen / vnd ewige Freude / vnd
Bonne haben werden / Welchen Trost G D E E
der Allmechtige durch den Heiligen Geist in den Her-
zen der jeko hochbetrübtten personen / vnd vnser al-
ler / bekrefftigen / vnd vns die gnade verleihen wolle /
das wir dem Exempel dieser nunmehr in G D E ru-
henden Christlichen Matronen nach / auch der Gott-
seligkeit / welche zu allen dingen nütze ist / vnd verhei-
schung hat / beyde dieses gegenwertigen / vnd des
künfftigen ewigen Lebens / wie der Apostel Paulus
1. ad Timoth. 4. sagt / vnd anderer schönen / vnd löb-
lichen Tugenden vns beflissen / an vnsern H E X X X
Iesum Christum glauben / vnser von G D E E
einem jedern gesetzten Sterbestündleins getrost / vnd
mit freuden erwarten / vnd in gewisser hoffnung des
ewigen

Leichpredigt

ewigen Lebens / vnd der seligkeit / also dann vnser
Seelen ihme in seine getreue / vnd Allmechtige Hen-
de / der frölichen Auferstehung am Jüngsten tage er-
wartende / auch befehlen mögen. Welchem einigen
ewigen / vnd wahren **G D T Z** Vater / Sohn /
vnd Heiligem Geiste sey Lob / Ehre / Preis /
vnd Danck gesagt in alle ewigkeit /
Amen / Amen /
Amen.

Jesus Sprach am 41. Cap.

Kinder zeugen / vnd Statt bes-
sern / machet ein ewig gedechtnus:
Aber ein Ehrliches Weib mehr
denn die alle beyde.



Gedruckt zu Zehna / durch Christoff
Lippold.

Ha 5670 OK

[Faint, mirrored text bleed-through from the reverse side of the page, likely a Latin or German manuscript.]

[Faint, mirrored text bleed-through from the reverse side of the page.]

[Faint, mirrored text bleed-through from the reverse side of the page.]

[Faint, mirrored text bleed-through from the reverse side of the page.]

[Faint, mirrored text bleed-through from the reverse side of the page.]

M

[Faint, mirrored text bleed-through from the reverse side of the page.]



AK. 291.

Eine Christ
dem dritte

Bei de
chen Begrä
Edlen/Gottselig
Matronen / Frawen
dorff/ des Ehrwürdigen /
Johan von Krackaw / D
Naumburg vnd Zeitz / re.
verschieden / zur Naumb
jetzt laufenden 160.
Monats/ Chr

Herrn Jo
num D

Gedr
M

UNIVERSITÄT
HALLE
(SAALE)
BIBLIOTHEK



a
670

